



Comunicat de stampa

Scunanza per la grupa dl Saslonch cun i Plans de Cunfin y la Zità di Sasc

Ancuneda cun l'assessëur provinziel Peter Brunner per l'ampliamënt dl Parch Naturel y per n ampliamënt dl Monumënt Naturel dla Zità di Sasc

Per rujné dl daunì dl raion ntëur ala grupa dl Saslonch, se à ancuntá tl ufize provinziel per la Defendura dl ambient, dla natura y dl clima, l'assessëur provinziel Peter Brunner y si cunlauradëures debrieda a plu lies per l'ambient y da mont. L'argumënt prinzipel fova la proposta de mëter la grupa dl Saslonch cun i Plans de Cunfin y la Zità di Sasc tl Parch Naturel dl Scilier- Ciadenac, coche ënghe l'ampliamënt per l'Monumënt Naturel dla Zità di Sasc. Pra mëisa sentova raprezentanc dla grupa de iniziativa Nosc Cunfin, l'Alpenverein dl Südtirol, (AVS), Heimatpflegeverband Südtirol (HPV), Dachverband für Natur- und Umweltschutz (DNU), Mountain Wilderness (MW), CAI Alto Adige y CAI Bulsan.

Dé pëis a sustèni de slargé ora l'Parch Naturel

La presidënta dla grupa Nosc Cunfin Heidi Stuffer lecurdova al scumencimënt la deliberes di chemuns dla valeda fates dl 2010/2013 y 2024/25 y la mozion provinziela 618/22, che dà la ncëria ala jonta provinziela de acumpanië n prozes partizipatif per l'svilup dl daunì. La grupa de Nosc Cunfin vën sostenida da plu che 70.000 zitadins y à pudù pië do d'ansciuda la recunescënza dla "Bandiera verde 2025" de legambiente Italia. Ti ntervënc da pert dla lies per l'ambient y da mont, iel unì auzà ora l'patrimone ecologich dla grupa dl Saslonch. Gianluca Vignoli à sottrissà, che la cuntreda sibe "n raion de gheneda y de biodiversità" amez ite te raions da stramp sfrutei dal turism. Debrieda à i raprezentanc dla lies per l'ambient y da mont la gran responsabilità de mantenì chësc raion unich per la proscima generaziòn: "N parch Naturel fossa n sèni de ududa danora y desmustrëssa snait tla politica provinziela."

Discuscion dla puscibilteies de mëter n droa

L'assessëur Peter Brunner y i cunlauradëures prejënc à purtà dant la desfidedes de l'amplimënt de Parch Naturel – coche la sèida provinziela cun la provinzia de Trënt, la nfrastrutres da sën y cuestions de puscions privates. L'assessëur provinziel á fat la proposta de valuté alternatives ala detlarazion de raions cun scunanza ntan l'elaborazipn dl plan de defendura dla Mont de Sëuc, p.ej. coche raions cun scunanza particulera, udù dant dala lege provinziela di raions y dla cuntreda nr. 9/2018 art. 11. A chësta maniera pudëssa unì arjont la scunanza damandada, per pudëi schivé nfrastrutres nueves, zënza messëi fé tres la pruzedura per n Parch Naturel. L'assessëur Brunner minova che chësta streda ie politicamënter plu scëmpla da mëter n droa y ënghe te n tēmp nia massa lonch.

La lies à aprezà chësta pruposta, ma dajova da ntënder che si vijion per l dauni resta sambën inant n Parch Naturel. La realisaziuns de raions cun scunanza particulera dëssa avëi estensions de dimensions majeres per arjonjer l medemo valor de scunanza.

Ampliamënt dl Monument Naturel Zitá di Sasc

Tla segunda pert dl'ancunteda univa rujená dl ampliamënt dl Monument Naturel Zitá di Sasc. I cunlauradëures à cunfermà l valor geologich y paesagistich dla cuntreda, che ie purtruep manacià da proiec de nfrastrutures. I raprezentanc dla lies per l ambient y da mont, danter chëi l geolog Stefano Febbroni á auzà ora, che la pruposta de ampliamënt se tèn avisa ala sèides natureles, che ie definedes da plu elemënc geologichs y geomorfologichs, che fossa da scuné. La pruposta ie stata laureda ora tecnicamënter a puntin.

L'aministrazion provinziela à spiegà, che l argumënt pudëssa unì tëut n cunsciderazion ntant l prozes de atualisazion dl plan de defendura per la Mont de Sëuc, che unirà laurà ora.

Ududa danora

Per stlù ju à l assessëur Brunner detlará, che la cunlaurazion cun la lies vën purteda inant y che ie udù dant for inò ancuntesdes per se giamie ora. Nosc Cunfin y la lies per l ambient à mpermetù de sustenì l lauré ora dl nuef plan de defendura per la Mont de Sëuc cun si expertise.

Duc l prejënc fova a una dla gran responsabilità che on, a mantëni l raion dla grupa dl Saslonch y si ntëurvia cun si richëzes ecologiches y de mèter chësc raion sota scunanza per la generaziuns che vën do.

Foto dl'ancunteda ai 16.10. tl palaz provinziel (da man ciancia a man drëta):

Thomas Hofer (persönlicher Referent des Landesrates)
Mara Elide Zanon (Amt für Landschaftsplanung)
Florian Zerzer (Abteilungsdirektor)
Leo Hilpold (Amtsdirektor),
Gianluca Vignoli (Nosc Cunfin und MW)
Peter Brunner (Landesrat für Natur-, Umwelt, und Klimaschutz, Energie, Raumentwicklung und Sport)
Heidi Stuffer, Robert Perathoner, Markus Piccolruaz (Nosc Cunfin),
Florian Trojer (Geschäftsführer Heimatpflegeverband)
Carlo Alberto Zanella (Presidente Cai Alto Adige)
Enrico Brutti (Bereich Schutzmanagement)
Maurizio Veronese (Presidente Cai Bolzano)
Stefano Febbroni (Cai Bolzano)

Sun la foto mancia:

Karl Heinz Dejori (Nosc Cunfin)
Hanspeter Staffler (Geschäftsführer Dachverband für Natur und Umweltschutz)
Georg Simeoni (Präsident Alpenverein Südtirol)